

欽定大清會典事例

欽定大清會典事例卷一百九十三

戶部

積儲

社倉積儲

義倉積儲

營倉積儲

社倉積儲○直省社倉義倉春則支借秋成還倉設正副社長司其出納每歲報該管地方官查覈○康熙四十二年

諭直隸各省州縣雖設有常平倉收貯米穀遇饑荒之年不敷賑濟亦未可定應於各村莊設立社倉收貯米穀直隸有旗下莊頭可合數村立一社倉其管理社倉事宜令莊頭內有情願經營者交與收貯百姓

村莊公設社倉。百姓有情願經營者。交與收貯。以備
饑荒。傳諭直隸巡撫。如設立社倉。果有益於民生。著
各省亦照例於各村莊設立社倉。收貯米穀。大學士
會同九卿詳議具奏。欽此。遵

旨議定。設立社倉。於本鄉捐出。即儲本鄉。今本鄉誠實
之人經營。上歲加謹收儲。中歲糶借易新。下歲
量口賑濟。○四十五年覆准。直屬社倉。四十一
二三等年勸捐米穀。共七萬四千九百七十石
有奇。出借窮民。得息米千有五十一石。又四十
四年。保永二府陸續捐穀四百三十五石有奇。

皆儲各屬社倉。係本鄉捐出者。即儲本鄉。令本鄉誠實之人經理。○五十四年議准。直省社倉勸諭之例。富民能捐穀五石者。免本身一年雜項差徭。有多捐一倍二倍者。照數按年遞免。至紳衿捐穀四十石。令州縣給扁。捐穀六十石。令知府給扁。捐穀八十石。令本管道給扁。捐穀二百石。督撫給扁。其富民好義。比紳衿多捐二十石者。亦照紳衿例。次第給扁。捐至二百五十石者。咨吏部給予義民頂戴。照未入流冠帶榮身。凡給扁民家。永免差役。○雍正二年

諭社倉之設。原以備荒歉不時之需。用意良厚。然往往行之不善。致滋煩擾。官民皆受其累。朕以為奉行之道。宜緩不宜急。勸諭百姓。聽民便自為之。而不當以官法繩之也。近時各省漸行社倉之法。貯蓄於豐年。取資於儉歲。俾民食有賴。而荒歉無憂。朕心深為嘉悅。但因地制宜。須從民便。是在有司善為倡導於前。留心照應於後。使地方有社倉之益。而無社倉之擾。督撫當加意體察。○又覆准社倉之法。原以勸善興仁。該地方官務須開誠勸諭。不得苛斂以滋煩擾。至收儲米穀。先於公所寺院收存。俟息米已

多。成造倉廩收儲。設立簿籍。逐一登明。其所捐之數。不拘升斗。積少成多。若有奉公樂善。捐至十石以上。給以花紅。三十石以上。獎以扁額。五十石以上。遞加獎勸。其有好善不倦。年久數多。捐至三四百石者。該督撫奏

聞。給以八品頂戴。其每社設正副社長。擇端方立品。家道殷實者二人。果能出納有法。鄉里推服。令按年給獎。如果十年無過。該督撫題請給以八品頂戴。徇私者即行革懲。侵蝕者按律治罪。其收息之多寡。每石收息二斗。小歉減息之半。大

款全免其息。止收本穀。至十年後。息已二倍於本。止以加一行息。其出入之斗斛。均照部頒斗斛。公平較量。社長豫於四月上旬。申報地方官。依例給貸。定日支散。十月上旬。申報依例收納。兩平較量。不得抑勒多收。臨時願借者。先報社長。州縣計口給發。交納時。社長先行示期。依限完納。其簿籍之登記。每社設立用印官簿一。樣二本。一本社長收執。一本繳州縣存查。登記數目。毋得互異。其存查一本。夏則五月申繳。至秋領出。冬則十月申繳。至來春領出。不許遲延。以

滋弊竇。每次事畢後。社長州縣各將總數申報
上司。如有地方官抑勒挪借。強行糶賣侵蝕等
事。社長呈告上司。據實題參。○三年題准。河南
社長。豫造排門細冊。將姓名年貌住址。以及官
紳士庶商賈。逐一註明。送官用印存案。日後借
貸。悉以此為準。其游手好閒者。不許借貸。於正
副社長外。再公舉身家殷實者一人。總司其事。
令其不時稽察。如有欺隱。令其賠償。果能使倉
儲充拓。題請加

恩。以示激勸。此項積儲。無論官員不得撥用。即同邑

之社亦不得以此應彼。如有官員抑勒挪借。許社長呈告上司。據實題參。其所需紙張筆墨。以及人役工食。或行勸輸。或撥罰項。以充其用。不得濫行科斂。致滋擾累。至積米既多。於夏秋之交。平糶秋成。照時價採買還倉。○七年

論。朕惟國家建立社倉。原令民間自行積貯。以百姓之資糧。濟百姓之緩急。其春貸秋償。及滋生羨息。各社自為經營登記。地方有司。但有稽查之責。不得侵其出納之權。此社倉之古法也。是以各省有請立社倉者。朕皆令其聽從民便。毋得強勒捐輸。繩以官法。以

致便民之舉。轉為民累。所以曉諭各省督撫者。不啻至再至三矣。從前於通省加二火耗內。應行裁減。每兩五分之數。且暫行徵收。發與民間採買穀石。分貯社倉。俟採買數足。即行裁減。是於暫收耗羨之中。隱寓勸輸之法。實則應行酌減之耗羨。即小民切己之資財。而代民買貯之倉糧。即小民自捐之積貯。此藏富於民之良法。最為切實而易行。乃陝省官員。不知此項穀石本係民資。以為收貯在官。即是公物。不肯付民經營。而胥吏司其出納者。遂有勒借之弊。殊非數年以來朕之周諮詳畫。多方生養斯民本意矣。今

特降諭旨。明白曉示。刊石頒布。俾各州縣鄉社小民。咸知朝廷經營設法之蓋藏。實百姓自為斂散之費。用。儻地方官有於社倉穀石。創議交官不交百姓。或指稱原係官項。豫為公事侵挪之地者。俱以擾撓國政。貽誤民生論。從重治罪。○十三年題准。雲南省設立社倉。通計一省所捐穀麥七萬餘石。其中千石以上者。僅二十餘處。此外皆數百石數十石。亦有全無社穀者。民間緩急之需。終不能免。按各屬皆有常平倉及官莊等穀。存儲尚多。可以酌量暫撥。以作社本。將社倉存儲未及千石者。

按地方之大小。計存儲之多寡。在於該處常平官莊等穀內。動撥五百石。或八百石。作為社本。令社長一併經營。出借窮民。秋成加一還倉。小歉免取其息。歸於社倉項下積儲。俟積有千石。社本仍將原動常平等穀歸還原款。○乾隆三年覆准。社倉積穀。將息穀十升。以七升歸倉。以三升給社長。作修倉折耗。如有逃亡故絕之戶。無可著追者。令社長報明地方官。查明確實。取結通詳。於七升息穀項下開銷。○又題准。四川省糶賣倉糧。除買補正項外。所賸餘價。均買作

社糧。以為民倡。而士民等隨各相率樂捐。自乾隆二年秋後。買儲穀二千九百七十餘石。捐儲穀二萬五千六百餘石。又達州內江等三十餘處。舊存儲穀二萬一千石。以上川省新舊社穀。共四萬九千五百石有奇。令加謹收儲。按年題報。社穀既多。必須倉廩。照前建常平倉例。每穀四百石。建廩一間。其工料銀。咨部於存公銀內動支。○四年題准。江西省社倉穀。每石收息一斗。仍循舊例。○五年覆准。陝西甘肅兩省所屬社穀有二項。一係百姓公捐。自行議定倉正倉。

副經理出入報官存案。不入官之交代。仍聽民料理。一係加二耗糧內留五分為社糧。責成地方官經理。○六年題准。山西省社倉獎勵之法。捐十石以上至三十石者。照例聽地方官給予花紅。三十石以上至五十石者。地方官給扁。捐至百石者。府州給扁。二百石者。本管道給扁。三百石者。布政使給扁。四百石者。巡撫給扁。捐至五百石以上者。具題給以八品頂戴榮身。其連年捐輸者。仍許積算捐數。照現定等次分別獎勵。地方官勸輸有方。大州縣每年勸輸至千五

百石以上。中州縣至千石以上。小州縣五百石以上者。均於計典內據實開明。分別考覈。○又覆准。地方官勸輸社倉。每鄉設立印簿一本。聽原捐之戶。不拘米麥雜糧。及數之多寡。自登姓名。捐數於簿。繳官以備稽查。並將一人連年報捐。先後積算。至十五石以上。亦准遞加獎勵。○又題准。社倉捐至三百石者。給以八品頂戴。四百石以上者。給以七品頂戴。○七年題准。江南安徽兩省社倉。能捐穀五石者。免本身一年雜項差徭。十石以上者。照例給獎。捐小麥粟米大

米。算作二穀。諸雜糧均作穀數計算。○十年議
准。各省社長。三年更換一次。選擇殷實良民充
補。令將經手社穀。同鄉保互相交代。取結報官
存案。如有虧缺。責令賠補。經營三年。毫無弊竇。
同社公保。再留三年。○又議准。社穀行令澈底
清查。如有實屬逃亡故絕。取具里鄰甲保結狀。
地方官加具印結。題請豁免。實有著落者催還。
至豐年不能全行借出者。轉飭各屬。即以實借
實還。按穀收息。毋得虛捏。以致開報不實。其息
穀充贏者。有貧無依倚之人。准其量借升斗。以

資接濟。○二十三年奏准。浙江省社倉。所需紙筆人工飯食之費。勢所不免。但向來未有支銷成例。以致社長慮及賠墊。憚於承充。應於每年所收息穀內。每穀一斗。收八升交倉。二升交與社長。以備費用。仍飭各州縣於勸捐時酌量情形。各該地方紳衿。願隨捐穀並輸倉費。即就所捐之數。量建倉廩。如無捐費之人。即擇各村莊寺院餘房。或殷實富戶寬閒房屋。暫賃一二間。將所捐穀石。交社長收儲。俟一年之後。計有息穀若干。先酌量建倉一二間。以資收儲。餘俟息

穀寬餘。陸續再行添建。○二十四年奏准。江蘇省社穀。有倉者歸倉。無倉者暫就庵觀間房存儲。俟息穀充裕。動用建倉。不許存於社長之家。其社倉雜費頗繁。歷年不無賠累。嗣後每息穀一斗。以七升歸倉。三升支用。○又奏准。江蘇省地方。每充社長。不無賠累。且招勞怨。均不願充。願充者多係漁利之徒。樂於久充。易於侵挪。其公正者。又恐久充賠累。嗣後一社中擇其殷實公正數人。輪流充當。一年一換。為時不久。不致賠累。一年一次。新舊交代。難滋侵混。○又奏准。

雲南省社倉。行於雍正二年。至今三十餘載。子
母相生。數逾十倍。自應因時定制。且此項穀石。
止供農民籽種之需。非同常平倉穀。以備平糶。
宜多為積儲者比。著照常平額數七分為率。其
已經足額及較額有餘者。自乾隆二十四年為
始。儘數存儲。按年斂散。永不收息。每石止收耗
穀三升。其未經足額之處。仍照例收息。俟足額
之日。一體免收。止收耗穀。儻不肖社長。及該州
縣等私行收息。挪移侵虧。立即嚴參究處。分別
追賠治罪。至官紳士民好義樂輸者。仍聽赴倉

捐輸。歲底另冊報部。以備修建社倉之用。○二
十五年覆准。廣東省社倉。所收息穀。責成州縣
稽查。每年每石准銷耗穀一升。其鋪墊造冊紙
筆等費。以及看守曬晾之人。應需工食。准於息
穀內酌量支給。如遇倉廩損壞。亦准動支息穀。
變價修理。分別報銷。所餘息穀。查明該州縣捐
積數目。如在五千石以上者。變價解繳存儲。以
為本地賑恤之用。原額不及五千石之數者。即
將餘息併入額穀之內。以充儲備。仍分別列入
奏銷詳題。僮社長等有於息穀之外。另有加耗

名色。以及額外需索等弊。即行究治。○二十八
年覆准。湖南省社倉。斗級工食。向係在於所收
加一息穀內。三升給社長盤量之費。其倉夫工
食。每年銀六兩。在於七升息穀內動支。但盤量
折耗。實不須三升之多。倉夫止須夜宿看守。日
間仍可傭趁工食。止應酌量給予。不比官倉斗
級。必須工食六兩之多。且各省社穀。均無另議
看倉工食之項。應於七升息穀內。撥出一升。加
給社長。連前共給四升。為盤量折耗。及看倉工
食之用。餘息六升。歸倉作本。若偶遇歉歲。許社

長於舊存餘息內通融支給。○三十七年議准。山東省社倉穀石。責令新舊州縣盤查交代。取具印結送部查覆。仍於年底將收支各數造冊題報。其有實欠在民。力不能完。及逃亡無著者。確查屬實。即於年底題報案內。取結豁免。庶內外俱有考察。而積儲益昭謹嚴。各省一律辦理。○三十九年奏准。安徽省各屬社倉穀石。定以四十萬石為額。其餘穀石。於青黃不接之時。儘數出糶。糶價解存司庫。遇有民間必須工作。奏明動用。如息穀復充。過十萬石以上。隨時照此。

辦理。○四十年奏准。山西省社義兩倉。本穀共四十八萬八千五百餘石。息穀共四十五萬八千七百餘石。酌存息穀十萬石。其餘三十五萬八千七百餘石。各州縣於糧價稍昂時。酌量出糶。價銀解儲司庫。遇有地方農田水利公事。奏明動用。嗣後息穀積至十萬石以上。酌勘情形。奏明覈辦。○又奏准。福建省原額加捐社穀三十五萬七千石。留存儲備息穀積至五萬石以上。飭屬出糶。糶價易銀解司。遇有地方必須速辦之工。奏明動用。每年將動存各數。分析造報。

○四十一年議准陝西省正副社長。經管一年。公慎無過。賞息穀一京石。二年無過。賞息穀三京石。三年無過。賞息穀五京石。如不願賞穀。即以此五京石之數。令地方官置給扁額。○又議准直省社長經手倉糧。一年無過。給以花紅。三年無過。給以扁額。五年無過。免一身差役。○十四年奏准江西省各屬社倉。額設本穀四十萬一千九百二十一石零。節年所收息穀三十二萬三千八百五十六石零。額設本穀。照舊存留。其餘息穀。按時價糶銀解司。遇有地方農

田水利等務。奏明動用。嗣後收息穀至五萬石以上。照此辦理。○四十六年奏准。湖南省社倉本息穀石。除本穀儲備借糶外。所有歷年積儲息穀。變價存司。以為民田水利隨時撫恤之用。○五十六年議准。陝西省社倉穀石。係耗羨銀兩買儲。與他省不同。如社長有侵蝕虧空穀石。先於社長名下勒追。如一年內不能全完。社長治罪。未完穀石。著落該州縣賠補。○嘉慶四年諭。社倉原係本地殷實之戶。好義捐輸。以備借給貧民之用。近來官為經理。大半藉端挪移。日久並不歸款。

設有存餘。管理之首士與書吏亦得從中盜賣。儻遇
儉歲。顆粒全無。以致殷實之戶。不樂捐輸。老成之首
士。不願承辦。是向來良法。徒為官吏侵肥。亦應一律
查禁。並著各該督撫等。將各省社倉。仍聽本地殷實
富戶。擇其謹厚者。自行辦理。不必官吏經手。以杜弊
竇而裕民食。○又覆准。各省社長。於歲底。將出入儲
欠數目。造冊結報一次。地方官轉報上司。造冊
報部。一切出納。聽民自便。○又議准。各省公舉
正副社長。止令呈官存案。如辦理妥善。照例獎
賞。如有侵蝕。經鄉民告發。照例治罪。經理不善。

仍聽同社自擇妥人請換。毋許官吏指名充補。及藉端為難。違者查出究辦。○又議准。各省社倉。如有應須修葺。即由同社鄉民報明社長。公同勘估修理。在於息穀項下糶變。具結報官存案。毋庸官為經營。以免書役從中滋弊。如社長辦理不善。或有侵蝕。許同社之人。公同報官究辦。俟修竣之日。將用過工料銀兩。並糶變穀石數目。造冊呈明地方官。歲底造冊申詳督撫存案。毋庸報部覈銷。○道光六年題准。陝西。廣西。二省社倉穀石。每歲出入數目。造報督撫。年終

具題。如實欠在民。力不能完。及逃亡無著。准督撫查明取結。於題報案內請豁。凡州縣交代。彙同常平倉一律盤查。造冊結報。至各直省社倉項下民欠未完穀石。實係力不能完。及逃亡無著者。亦一律取結題豁。○又議准。廣西省社倉穀石。係由常平倉息穀作本。並非出自捐輸。所有潯州。慶遠。鎮安。思恩。四府社倉。均照常平倉例。令桂平。宜山。天保。武緣。四縣經管。該府就近稽查。如社長有侵蝕虧空等弊。百石以上者。將該管官降二級留任。無論勒追代賠。完日俱准。

開復。○同治十年奏准。前令各省常平社倉。認真整頓。福建省以倉儲無多。議請分投採購。連同現存之穀。以二十萬石為度。遂於同治六七年。陸續購運足數。○光緒七年奏准。河南省臨潁縣紳士。捐社倉穀一千石。潞縣捐一千五百石。○九年奏准。四川省山多田少。戶鮮蓋藏。酌撥鹽釐。發給綿州。三臺等十一州縣。採買倉斗。穀二萬七千六百三十八石零。又捐集倉斗。穀一百一十八萬一千三百石有奇。分別存倉。以資備禦。

義倉積儲。○康熙十八年題准。地方官勸諭官紳士民捐輸米穀。鄉村立社倉。市鎮立義倉。照例議敘。○雍正四年題准。兩淮衆商公捐銀二十四萬兩。鹽政繳公務銀八萬兩。奉

旨以二萬兩賞給兩淮巡鹽御史。以三十萬兩為江南買貯米穀。蓋造倉廩之用。所蓋倉廩。賜名鹽義倉。即著兩淮巡鹽御史交與商人經理。欽此。遵

旨於揚州府治。建倉積儲。每年於青黃不接之時。照存七糶三之例。出陳易新。或於米貴之時。開倉平糶。總至秋成糶補。儻地方有賑濟之用。該撫一

面具題。一面動支。管理之商人。每年將出易糴補動支之數。呈報巡鹽御史覈實奏報。其出陳易新平糴平糴之內。或有贏餘。增買米穀。○五年議准。兩淮近窳之地。酌立數倉積儲米穀。以備貧苦窳戶一時緩急之用。○乾隆七年議准。山東省行銷票鹽地方。共十有三萬七千五百有七票。分上中下三等。照票輸穀。章邱。濟陽。萊蕪。淄川。新泰。德平。鄒平。商河。臨邑。惠民。十縣。列為上等。每票輸穀二石。共穀八萬九千八百五十八石。陵縣。濟東。陽信。長山。博山。樂陵。青城。臨

淄蒙陰臨朐益都高苑沂水費縣十四縣。列為中等。每粟輸穀一石五斗。共穀七萬六百二十六石。莒州新城博興濱州蘭山海豐樂安蒲臺日照濰化利津壽光昌樂濰縣郟城十五州縣。列為下等。每粟輸穀一石。共穀四萬五千四百九十四石。通計輸穀二十萬五千九百七十八石。分限二年交倉。僅遇本處歉收。仍准展限。於下年買足。給發章邱等三十九州縣。每年照社倉例。於春夏之交。查明實在乏食窮民。借給。照例加一收息。應建倉廩。令該商出資。在於城內。

及鉅鄉大鎮構造。每處立社長。社副各一名。二千石以上。設斗級一名。四千石以下。斗級二名。六千石以下。三名。八千石以下。四名。萬石以下。五名。萬二千石以下。六名。萬四千石以下。七名。社長社副。每年各撥給息穀二十四石。斗級每年各十二石。以資養贖。出借收領。責成地方官稽查。○十二年覆准。山西省義倉。士民捐穀。分別獎勵。照直省社倉之例。其所收雜糧。按照米穀時價。折算獎賞。其州縣能捐俸急公。首先倡率捐五十石者。記功一次。百石者。記功二次。百

五十石者記功三次。三百石以上者別行註冊。每逢奏報案內。並別有政績卓越。遴選升調。別作一條事實彙冊送部察覈。先予記功三次。三百石以上者於現任內紀錄二次。至義穀照直省之例。分鄉收儲。春借秋還。照社倉例每石加息一斗。所需倉費亦照直省於息穀內動用。僮士民情願捐資建倉。或捐倉屋地基木料等物。准其計價合算穀數。彙入捐穀內分別獎賞。再慎選倉正倉副。分別勸懲。游惰民人。禁其濫借。均照社倉例辦理。所有義穀。每遇州縣官交代。

時照例盤查。如有私借挪移。分別叅處。至儲穀之鄉。附近村莊。如猝遇冰雹。例不成災。農民有缺乏口糧籽種者。准其將穀借給。每年春借秋還。先儘雜糧出易。俟本息充裕之日。再照存七糶三辦理。其義倉出穀。每百石。收息穀十石。內一石為倉正。倉副紙張飯食之需。一石為倉穀折耗。一石為賃房之費。如遇歉收。免息之年。所需費用。於上年餘賸息穀內借給。俟下年收有息穀。照數撥還原款。○十八年覆准。直隸士民捐輸義倉積穀及數。應予獎賞者。照例具題。其

捐穀數目。每年一次專摺具奏。凡上年報捐及
出借動用之數。於次年二月內。奏明存案。以備
稽查。○嘉慶六年議准。各省社義二倉糧石。俱
係民間捐儲。以備借放。今社倉既已奉

旨歸民經理。所有義倉。即照社倉之案。一律辦理。○又
議准。近京五百里以內。旗民捐輸義倉穀石。獎
勵與民同。○又議准。各省義倉。聽民間公舉端
謹殷實士民二人。充當倉正倉副。一切收儲出
納事宜。責令經理。其公舉呈換賞罰年限。歲底
報部。照社倉例辦理。○又議准。義倉穀石。非本

地農民。概不准借。其已借常平社穀者。不准再借。直隸收成八九分者。加一收息。收成六七分者。免息。每石止收耗穀三升。收成五分以下。緩至次年秋後還倉。凡原借雜糧。按糧價易穀交還。應加息者。照穀數加息。河南山西廣西。每石收息一斗。歉年止收本穀。免其收息。湖北江西。出借不收息穀。○嘉慶十九年議准。吉林八旗左右兩翼義倉。額儲本色穀三萬四千石。如有逾額之糧。春閒糶於旗人。所糶價銀。作為修理義倉。買補牛具費用。○道光五年。

諭陶澍奏勸設義倉章程一摺。國家養民之道。足食為先。而裕民之原。積貯尤重。前年安徽偶遇荒歉。賑撫兼施。該撫請設立義倉。為未雨綢繆之計。所議章程。如州縣中每鄉村公設一倉。秋後聽民捐輸。歲歉酌量散給。出納悉由民間經手。不假官吏。防侵蝕以禁騷擾。矜貧寡而杜爭端。各條著即移交新任巡撫照議妥為經理。仍督飭各州縣實心實力。勸導有成。總期經久無弊。不必另立倉名。○咸豐二年

諭上年陸建瀛奏勸捐鄉穀。上元江甯二縣各捐穀二萬餘石。辦理已有成效。當經降旨。令該督轉飭各

屬。按照章程。廣為勸導。並著各省督撫。一體妥辦。原以義倉之設。最為便民善政。封疆大吏。果能飭屬實力奉行。圖匱於豐。自能有備無患。現在江蘇省續捐鄉穀。共有若干。及各省如何舉行。均未據詳細奏聞。著再行申諭各督撫體察地方情形。年歲豐歉。飭屬勸諭紳民。妥為籌辦。據實具奏。○同治六年

諭。向來各直省州縣。設立常平倉以外。復設義倉。原以廣積儲而備災荒。立法本為至善。自軍興以來。地方被賊擾害。舊有義倉。每多廢棄。亟應及早興復。以備不虞。著各直省督撫。即飭所屬地方官。申明舊制。酌

議章程。勸令紳民量力捐穀。於各鄉村廣設義倉。並擇公正紳耆。妥為經理。不准吏胥干預。該督撫等務當實力奉行。不得視為具文。○光緒十年

諭。各省捐積倉穀。原為思患豫防之至計。惟存積過久。消耗必多。借借商民。亦滋流弊。著各督撫。妥定章程。由地方公正紳董。酌價平糶。按時買補。僅遇天災。並准地方官一面詳報。一面開倉散放。拯救災黎。以收備荒實效。

營倉積儲。○直省提鎮駐紮之地。及凡屬沿邊沿海與離省遙遠者。皆設倉儲穀。以備軍士借

糶。委營弁經理。○康熙三十年

諭江甯京口等處官兵駐防之地。著將漕米各截留十萬石。建置倉廩。以備積貯。○四十年題准。楚省漕糧二十萬九千餘石。儘數截留。存於江南江甯省倉。以六萬四千石充給兵餉。將採買兵米價值。照數扣留。以四萬五千石。分撥淮安等處平糶。以濟民食。俟秋成後。將糶賣米價。並兵米扣留價值。照數買補還倉。其餘存贖之米。如不動用。仍俟下年循例給兵發糶。○四十九年議准。湖南省鎮草地方。僻處苗邊。改協為鎮。兼駐道廳。

兵民日增。若遇歲歉。恐食有不敷。撥司庫銀三千兩。買穀備儲。○雍正四年題准。廣東省邊海之南澳鎮右營。澄海海門。達濠等營。儲穀五千二百石。潮州鎮標三營。黃岡協潮陽營。共儲穀五千三百石。碣石鎮標三營。惠來。平遠。大鵬等營。儲穀六千二百石。提標五營。儲穀五千石。督標並水師六營。肇慶城守營。共儲穀七千石。計每兵一名。存穀一石。以備借貸。秋收免息徵還。其買穀動支羨餘銀。造倉運儲。盤查交代。均取結報部。侵挪虧缺。指名題參。○七年題准。廣東

潮州城守饒平平鎮三營捐資買穀三千石分給三營於青黃不接之時借給俟散餉時照數扣除概免加息令各營將備經管儻有侵挪缺少照正項錢糧例追賠治罪○九年題准廣東省瓊州鎮瓊協龍門協虎門協香山協廣海寨共穀萬六百石分儲各協營其買穀價銀並建倉銀在於鹽政節省銀內動支○十一年奏准四川省潘州達建寺二處新設官兵應支米折銀照普安營之例將次年應支四季運折米價於本年秋成後全數領出買儲散給並於潘州

協標儲米二千石。達建寺營儲米五百石。每於青黃不接。酌量平糶借支。秋成買補還倉。○又題准。四川省新設苗疆。西河七兒筆建造倉廩。儲米二千石。交與該同知會同營員收儲。○又題准。四川省潘州達建寺二處。修建倉廩。潘州協標儲米二千石。達建寺營儲米五百石。交營員收儲。○乾隆元年議准。廣東省左翼鎮逼近邊海。人稠穀少。若穀價稍昂。兵丁難於買食。宜照各營置倉。以濟不給。動用鎮標現存公糧銀一千一百餘兩。買穀三千石。設倉存儲。於青黃

不接之時。均借兵丁。秋收買補。其應設倉廩。即查營中空閒房屋改造。○二年奏准。湖南省辰州府屬永綏協營。於司庫三分公項內。動銀二千兩。令同城駐防永綏同知。赴產米州縣採買。運儲高巖倉。交營員收儲。遇有缺食兵丁。酌量接濟。所需米值脚價。在於該兵應領季餉內扣存。彙交同知買運。循環供給。○又議准。浙江省溫州鎮所轄樂清等九營。於公糧銀內動支。買穀分儲。以濟兵食。每兵一名。備穀二石。共買穀一萬三千三十八石。令都司各官盤收監管。遇

青黃不接。每名按月借穀六斗。分作六月扣存。共建倉二十三間。每間儲穀六百石。所需工料。亦在公糧銀內動支。○四年題准。四川省成都駐防兵米。均係折色。每遇價昂。艱於採買。將司庫現存生息餘賸銀。飭發附近州縣。及時採買。遇青黃不接。支給各兵。在餉銀內分三月扣還。如有浮冒剋扣者。題參。其應需倉廩。即在協領佐領空房二所存儲。如有滲漏。該地方官估修。○又題准。福建省海壇金門澎湖閩安烽火銅山等六鎮協營。共買穀二萬石。存儲各鎮協營。

遇青黃不接。酌借兵丁。免其加息。秋收散餉。扣除買補。共建倉四十三間。所需工料。在於正項銀內動支。○又題准。浙江省溫州鎮標中。左右三營。及城守營。共計儲穀五千九百二十八石。合計倉廩每間儲穀六百石。應建倉廩十間。每間工費銀二十兩。共需銀二百兩。樂清營儲穀千六百十有六石。應建倉廩三間。共需銀六十兩。瑞安營儲穀千六百六十二石。應建倉廩三間。共需銀六十兩。平陽營儲穀二千八十八石。應建倉廩四間。共需銀八十兩。大荆營儲穀千

二百有八石。應建倉廩二間。共需銀四十兩。磐石營儲穀五百三十六石。應建倉廩一間。需銀二十兩。均於公糧銀內動支。○五年奏准。四川省提標五營。將存積公費銀。動支買穀存倉。自乾隆六年為始。遇青黃不接。按名借給。照原買穀價。於夏秋季餉銀內扣除。買穀還倉。營中現有倉廩。毋庸別建。○又奏准。河標四營。已於元年建設營倉。以資兵丁接濟。而黃河南北兩岸。河兵堡夫。未經設有倉儲。應動用河營生息銀六千兩。收買麥穀。交蘭陽縣知縣經營出入。開

歸河北兩道。公同按季盤查。於每年春閒糧價昂貴之時。具詳借給兵夫。秋收催令照數歸還。免其加息。○九年奏准。河南省駐防營所需糧餉草豆。向係折色。嗣後於兩翼各設常平倉一座。將駐防營息銀。於麥熟秋收價平之際。無論米豆二麥。均行買儲。遇青黃不接。照依原價糶給兵丁。仍俟麥熟秋收。再行買補。其倉廩令城守尉酌定開數建造。○十二年咨准。湖南省永綏協營兵米。在南路高巖增建倉廩四間。以備存儲。今置買苗田八畝。四圍高築牆垣。改增房

屋其工料銀在於公項內動給。○又題准四川省成都駐防兵丁口糧與其全行折銀。不如按月酌給米糧。計兵丁每年應領銀四萬五千六百五十五兩。內將二萬石米價銀。豫先扣存藩庫。俟秋收後。令各州縣分買存儲。駐防倉廩。令副都統酌給兵丁。其各州縣用過米價腳價。據實報部。○又覆准山東河標兵丁。以標營生息銀買穀四千石。設倉存儲。令城守營都司經營。河標副將盤查。春閒借給兵丁。秋收免息徵還。儻有侵挪等弊。即將經營各弁究參。其倉廩舊

有四門城樓。空閒高燥。足敷收儲。毋庸別建。○
二十八年議准。

盛京戶部內倉。錦州蓋州牛莊甯遠廣甯遼陽義
州熊岳復州甯海岫巖鳳凰城開原等十三城
倉。額儲米石。每年於青黃不接之時。照民倉米
石借給旗民之例。按存七糶三。酌量借給兵丁。
秋收徵還。○又議准。拉林阿勒楚喀二處額儲
糧石。每年收官莊所交新糧一千八百石。亦行
入倉。除備支二處俸祿口糧。約需三百石外。其
餘贖糧石。照數於額儲陳糧內換出。每石照時

價減銀一錢。賣給兵丁。價銀留為公用。如遇青黃不接之時。酌撥額儲糧石。借給官兵。秋後照數徵還。○二十九年奏准。齊齊哈爾城。儲穀二十萬石。墨爾根城。黑龍江。各儲穀十萬石。齊齊哈爾墨爾根二城。倉儲尚未足額。黑龍江較原額餘穀萬五千五百餘石。又呼蘭地方。額儲糧七萬石。每石照時價減銀五分平糶。其尚未足額之齊齊哈爾墨爾根。如有陳穀。以十分之一。照時價減銀五分。糶給兵丁。均於餉銀內。分作二季坐扣還項。值豐收之年。照時價買補還倉。

○又定。凡旗倉額儲倉糧。每年出陳易新。將額儲變色糧石。照時價減銀平糶。吉林甯古塔三姓。伯都訥。拉林。阿勒楚喀等五處。每石照時價減銀一錢。黑龍江。齊齊哈爾。墨爾根。呼蘭地方等四處。額儲倉糧。以十分之內。劃出一分。每石照時價減銀五分。糶給兵丁。其價銀於兵餉內分作二季坐扣還項。價銀留存各本處公用。按年造入倉糧奏銷報部。○五十八年議准。西藏糧石。難以多儲。已經買儲青稞一千五百石。小麥五百石外。再添買小麥青稞共一千石。以足

三千石之數。作為定額儲倉。以備軍儲。仍每年酌量情形。出陳易新。毋致微變。○嘉慶十年議准。湖南省鳳凰。乾州。永綏。古丈。坪保靖。五廳縣。添建倉廩一百間。採買穀四萬石。分儲鳳凰廳二萬五千石。乾州廳三千石。永綏廳一萬石。古丈坪五百石。保靖縣一千五百石。如遇歲歉。及青黃不接之時。詳明借濟屯兵練勇。秋後免息還倉。仍令各廳縣將分儲穀石。年終造冊送部備查。○又議准。湖南省鳳凰。乾州。永綏。古丈。坪保靖等五廳縣。礪卡駐兵案內。土民均出田一

萬八千畝。每年約收租息穀一萬八千石。除支給練勇口糧穀七千二百石外。餘穀一萬八千石。照依時價變賣。為兵丁鹽菜口糧之用。至各苗寨繳出強佔田三萬一百餘畝。並逆產田地五千餘畝。約計歲收租籽二萬二千餘石。今各苗寨擇地建倉收儲。公舉殷實苗弁二三名。專司收放。歲給苗兵口糧米一萬八千餘石。計餘米四千餘石。積存苗倉以備撥補。並閏月口糧之用。年終造冊送部備查。○十九年議准。吉林官兵。每年春閒應借糧石。在該處八旗左右兩

翼義倉支給。秋後還倉。

欽定大清會典事例卷一百九十四

戶部

漕運

額徵漕糧
米折銀

隨漕正耗
隨漕席木板竹

隨漕輕齋易

額徵漕糧

○正兌漕糧

運京

各省原額三百三

十萬石

山東二十八萬石。河南二十七萬石。江蘇一百一十一萬三千石。安徽三十八

萬七千石

江西四十萬石。浙江六十萬石。湖北

十有二萬二千九百四十二石七斗一升有奇

湖南十有二萬七千五百四十七石二斗八升有奇。內除永折米改徵黑豆

米。並節年荒缺開墾報升不足原額外。以光緒

十三年計之。共米二百四十七萬八千六百九

十四石九斗四升有奇。內山東十六萬一千五

百四十八石六斗有奇。河南二萬四千三百三十六石五斗有奇。江蘇八十五萬八百五十七石四斗有奇。安徽十六萬五千五百六十九石有奇。江西奏銷冊正改兌不分。共米五十萬一

千七百一十五石有奇。浙江五十八萬四千九

百九十八石四斗有奇。湖北九萬四千一百八

十七石八斗有奇。湖南九萬五千四百八十二

石六斗有奇。謹案嘉慶十七年米數共二百五十六萬一千二百七十八石七斗

四斗有奇。內山東八萬三千二百五十八石八斗有奇。河南九千二百五十七石一斗九升有

奇。江蘇百有一萬五千九百一十七石五斗七升有奇。安徽二十九萬四千六百六十四石六斗七

升有奇。江西三十五萬一千六百八十三石九斗六升有奇。浙江六十二萬一千四百七十三

石九斗一升有奇。湖北九萬三千六百七十六石二斗八升有奇。湖南九萬五千五百四十六

石三斗三升有奇。○改兌漕糧。州倉。各省原額七十萬

石。山東九萬五千六百石。河南十有一萬石。江

蘇九萬三千九百五十石。安徽二十萬四百

五十石。江西十有七萬石。浙江

三萬石。湖北湖南均無改兌米。內除永折米改

徵黑豆米。並節年荒缺開墾報升不足原額外。

以光緒十三年計之。共米二十七萬二千六百

五十石有奇。內山東七萬八千二百三十三石

二斗有奇。河南一萬五千五十石一斗有奇。江

蘇十三萬一千八百四十九石四斗有奇。安徽

一萬八千一百五十二石有奇。浙江二萬九千

三百六十五石五斗有奇。謹案嘉慶十七年米數共四十二萬六千

五百六十二石七斗一升有奇。內山東四萬二千九百二石五斗二升有奇。河南九千五百四

十六石五斗四升有奇。江蘇八萬八千三百七十六石四升有奇。安徽十萬四千五百一石七

升有奇。江西有五萬一千八百八十二石三斗三升有奇。浙江二萬九千三百五十三石二

斗有奇。○白糧。分運京倉。通各倉。江蘇蘇州。松江常州。三府。

太倉一州。原額十有五萬四百三十八石四斗

七升。除改徵漕糧外。實徵六萬九千二十五石。

白秈米六萬五千六百五十一石。白糯米三千三百七十四石。浙江嘉興湖州

二府。原額六萬六千二百石。除改徵漕糧外。實

徵二萬九千九百七十五石。

白稅米二萬五千三百四十九石。白

糯米四十六石。

共實徵白糧九萬九千石。○小麥。

運京食

山東正兌麥九千九百一十五石七斗六

升。耗麥二千四百七十八石九斗四升。改兌麥

九千三百九十一石七斗。耗麥一千五百九十

六石五斗九升各有奇。河南正兌麥二萬四千

六百五十二石七斗八升。耗麥六千五百八十

八石七斗一升。改兌麥一萬二千七百六十六

石九斗六升。耗麥二千一百七十石三斗八升

各有奇。共實徵正兌改兌正耗麥六萬九千五

百六十一石八斗四升有奇。○黑豆。運京倉山東

正兌豆八萬二千一百一十四石三斗一升。耗

豆二萬五百二十八石五斗七升有奇。改兌豆

三萬一千八十二石二斗四升各有奇。耗豆五

千二百八十三石九斗八升有奇。河南正兌豆

六萬七千九百三十四石三斗二升有奇。耗豆

一萬八千二百二十石三斗八升有奇。改兌豆

二萬八千二百三十五石五斗三升各有奇。耗

豆四千八百石四升有奇。共實徵正兌改兌正

耗豆二十萬八千一百九十九石三斗一升有

奇。

山東河南二省起徵黑豆均係粟米改徵。向無定額。視京倉粟米黑豆何項不敷。戶部倉

場侍郎酌量情形。隨時奏明辦理。

○永折漕糧。山東七萬石。河

南七萬石。

均每石折銀六錢八錢不等。

江蘇十萬六千四百

九十二石六斗九升。

每石折銀六錢七錢不等。

安徽七萬五

千九百六十一石三斗一升。

每石折銀五錢六錢七錢不等。

湖

北三萬二千五百二十石六斗。湖南五千二百

十有二石五升各有奇。

均每石折銀七錢。

共永折米三

十六萬一百八十六石六斗六升有奇。○灰石

改折。江蘇二萬九千四百二十四石二斗二升。

浙江一萬八千六百五十三石一斗八升。共改

折米四萬八千七十七石四斗。遇閏加折四千

十有五石三斗。

每石連耗折銀一兩二錢。

隨漕正耗

隨正起運。以為京通各倉耗米。並沿途折耗之用。

○山東每

正兌米一石。加耗二斗五升。內以一升七合六

抄。在水次給丁。其餘二斗三升二合九勺四抄。

隨正起交。每改兌米一石。加耗一斗七升。隨正

起交。麥豆如之。河南每正兌米一石。加耗二斗

五升者。內以一升七合六抄。在水次給丁。其餘

二斗三升二合九勺四抄。隨正起交。加耗二斗

八升者。內以一升七合六抄。在水次給丁。其餘

二斗六升二合九勺四抄。隨正起交。每改兌米一石。加耗一斗七升。隨正起交。麥豆如之。蘇松糧道所屬之蘇州松江常州鎮江四府。並太倉州屬。每正兌米一石。加耗四斗。除一斗五升。隨船作耗外。二斗五升內。以二升七合六抄。在水次給丁。其餘二斗二升二合九勺四抄。隨正起交。每改兌米一石。加耗三斗。除一斗三升。隨船作耗外。一斗七升內。以二升七合六抄。在水次給丁。其餘一斗四升二合九勺四抄。隨正起交。

常州府無
改兌米。

江安糧道所屬之江甯府。每正兌米

一石。加耗四斗。除一斗五升。隨船作耗外。二斗五升內。以二升七合六抄。在水次給丁。其餘二斗二升二合九勺四抄。隨正起交。每改兌米一石。加耗三斗。除一斗三升。隨船作耗外。一斗七升內。以二升七合六抄。在水次給丁。其餘一斗四升二合九勺四抄。隨正起交。淮安揚州二府。通海二州屬。並徐州府屬之邳州。宿遷。睢甯等三州縣。每正兌米一石。加耗三斗。除五升。隨船作耗外。二斗五升內。以二升七合六抄。在水次給丁。其餘二斗二升二合九勺四抄。隨正起交。

每改兌米一石。加耗二斗五升。除八升隨船作
耗外。一斗七升內。以二升七合六抄。在水次給
丁。其餘一斗四升二合九勺四抄。隨正起交。雖甯

縣無改兌米。

徐州府屬之銅山。豐沛蕭碭山。五縣。每

正兌米一石。加耗二斗五升內。以二升七合六
抄。在水次給丁。其餘二斗二升二合九勺四抄。
隨正起交。每改兌米一石。加耗二斗二升。除五
升隨船作耗外。一斗七升內。以二升七合六抄。
在水次給丁。其餘一斗四升二合九勺四抄。隨
正起交。安慶甯國池州太平廬州五府。並六安

州屬。每正兌米一石。加耗四斗。內二斗五升。隨

正起交。一斗五升。隨船作耗。廬州府並廣德州

屬。每改兌米一石。加耗三斗。內一斗七升。隨正

起交。一斗三升。隨船作耗。廣德州無正兌米。安慶池州太平甯國四

均無改兌米。鳳陽潁州二府並泗州屬。每正兌

米一石。加耗三斗。內二斗五升。隨正起交。五升

隨船作耗。每改兌米一石。加耗二斗五升。內一

斗七升。隨正起交。八升。隨船作耗。江西每正兌

改兌米一石。加耗四斗。內正兌米。除一斗五升

隨船作耗外。二斗五升。內以二升七合六抄。在

水次給丁。其餘二斗二升二合九勺四抄。隨正起交。改兌米以二斗三升。隨船作耗。一斗七升。隨正起交。浙江每正兌改兌米一石。加耗四斗。內正兌米。除一斗五升。隨船作耗外。二斗五升內。以二升七合六抄。在水次給丁。其餘二斗二升二合九勺四抄。隨正起交。改兌米以二斗三升。隨船作耗。一斗七升。隨正起交。湖北每正兌米一石。加耗四斗。除一斗五升。隨船作耗外。二斗五升內。以二

升七合六抄。在水次給丁。其餘二斗二升二合九勺四抄。隨正起交。湖北湖南均無改兌米。○嘉慶四年

議准。江蘇省漕糧耗米項下。原備節隨耗米四升七合六抄內。撥出二升七合六抄。開兌時劃付旗丁。所贖二升。隨糧交倉。○又議准。浙江江西湖北湖南等省。俱照江蘇之例。原備節隨米內。劃給二升七合六抄。惟山東江南糧船運通程途較近。照浙江等省津貼之數。減去一升。各劃給旗丁米一升七合六抄。○五年定。江蘇浙江江西湖廣山東河南等省。正兌項下。原備節

賜米石內。既經分別劃付旗丁。所餘二升三升之數。不得全作折耗計算。應由倉場於漕米進倉抽驗時。將各倉折耗確數。切實查報。其中實有折耗過多。不敷作正之處。倉場親查確實。取具監督等印結。報部題銷。改兌項下。並未劃給旗丁。仍照舊例辦理。○又議准。江南省改兌米石。原備篩颺耗米四升八合三勺二抄。除常州府無改兌米石外。其餘各屬。有正兌米多而改兌米少者。有改兌米多而正兌米少者。若將改兌米劃出。不敷運費。嗣後將改兌篩颺耗米內。

一體劃給旗丁米二升七合六抄。○又奏准原備篩颺折耗除劃付旗丁外不敷進倉折耗將三升八合餘米撥出八合量為抵補。○又奏准各省劃給旗丁篩颺耗米於水次兌漕時令各州縣按照市價代為售變所變價銀交給各丁一經兌完開幫毋許顆粒上岸。○又奏准河南省改兌項下應交篩颺米石到壩時誤行劃付旗丁於倉場應得養廉內按例價扣繳歸款。○又定撥運薊易米石向係覈計平米派截正兌項下原備篩颺既經扣給旗丁其撥運項下另

用正項米石。照數抵補。○又定。河南省額徵正耗白麥一萬石。內正兌白麥五千八十六石四斗。每石應劃給旗丁篩賜麥一升七合六抄。於該幫所裝耗米內劃給。以抵正兌白麥。應給篩賜之數。○六年定。河南省額徵白麥內。應給旗丁篩賜麥石。在耗米內劃給。不敷米石。在耗豆內抵給。○又定。山東省應給旗丁篩賜耗米。照江西之例。通省幫船。將正兌項下應劃付旗丁一升七合六抄耗米。均勻分給。○七年奏准。湖北省帶徵正兌項下應給篩賜米石。照江蘇之

例一體支給。○十一年奏准。河南省帶運漕糧。向不劃給節賜耗米。嘉慶十年帶徵八年漕糧。其率行劃給節賜米麥豆折銀兩之糧。道照例降一級調用。其各幫委係糧道飭催。遵照具領。並非自行濫支。運弁職名。免其開送。○十五年奏准。浙江省漕白幫船。在途節節淺阻。守候日久。丁情竭蹶。將每石應交節賜米二升七合六抄。比照緩交餘米之例。緩至下年帶交。○十九年奏准。大河前幫。因東省牯河阻淺。行走稽延。又奉起截易糧。雇撥交卸。需用較繁。所有應交

節賜耗米。緩俟下運搭解。以紓丁力。○道光三年奏准。安徽省池州幫漕糧被雨。米質受傷。起卸進倉時。內有不堪交納米四百餘石。照數易換賠補。所有應交節賜耗米。因幫丁疲乏。緩俟下年帶交。○又奏准。浙江省杭嚴等十六幫。因在楊村起撥米石。被雨受傷。責令儘數易換賠補。所有應交節賜耗米。緩俟下年帶交。其杭三紹前兩幫。除耗米抵補外。尚有不堪交納正米二千六百餘石。一併准其帶回。緩俟下運。同應交耗米。照數完納。○七年奏准。浙江省台前等

十二幫。因上冬起運漕糧。不能一律飽綻。米石折耗較多。無力賠補。所有應交節賜耗米。暫緩交倉。自道光七年冬運起。勻分三限搭解還款。○咸豐八年定。漕南水腳及隨漕等項銀兩。現因漕船停運。均解交道庫報撥。並暫濟兵餉。○同治四年奏准。嗣後浙江漕截銀兩。併入地丁統徵分解。毋庸隨漕另徵。以歸簡易。至此項銀兩。每米一石。徵銀三錢四分七釐。較之江安糧道所屬。每米百石徵銀五兩。蘇松糧道所屬。每米百石徵銀十兩。米五石。多寡實相懸殊。應如

何量為覈減。俾利民生。仍不致有妨海運之處。應令該撫通盤斟酌情形。奏明辦理。○又奏准漕截一項。原為給帑濟運而設。浙省漕截。雖較重於他省。然既減漕額。又禁浮收。自不致再以賦重藉口。若一經覈減。海運經費恐不敷用。况漕截既與地丁並徵。愚民無知。必謂杭嘉湖三府。不僅減漕。並減錢糧。勢必妄生希冀。殊多窒礙。所有浙省應增漕截銀兩。仍請照舊辦理。毋庸覈減。並照例令有漕州縣。於隔歲年底。刊刻易知清單。將地丁加耗若干。漕截加耗若干。逐

一註明俾花戶照單完納。

隨漕輕齎易米折銀。○每正兌米一石。山東。河

南。又徵耗米一斗六升。謂之一六輕齎。江蘇。安

徽。二斗六升。謂之二六輕齎。江西。浙江。湖北。湖

南。三斗六升。謂之三六輕齎。每改兌米一石。又

徵耗米二升。謂之二升易米折銀。均每升折徵

銀五釐。解倉場通濟庫。山東河南。並江蘇徐州

山五縣。每改兌米一石。加耗米二斗二升。俱俸

交納本色。不徵易米折銀。湖北湖南二省。無改

兌米石。亦無○康熙五年議准。輕齎等銀。例應
易米折銀。
先漕解通。以濟運務。令各省巡撫就近督催糧

道依期完解。如有遲誤。聽倉場侍郎題參。○十三年定。江安等府州。每年起解輕齋。又搭解輕齋銀兩。照蘇松等府州。每兩支給三分水脚。造入奏銷冊內覈銷。○四十七年題准。嗣後各省額解輕齋銀。山東。河南。湖廣。江西。浙江。五省。及江南。江安糧道所屬。解存通濟庫應用。蘇松糧道所屬輕齋銀。解交部庫。如倉場不敷應用。咨部支發。○六十年題准。蘇松糧道所屬額解部庫之輕齋銀。十有三萬兩。仍分撥五萬兩。解通濟庫備用。其餘均解部庫。○乾隆五年覆准。湖

南省起解輕齋銀兩。需用盤費等項。向於該省公捐備用銀內給發。嗣因停止公捐。將起解輕齋銀兩。需用盤費等項。於地丁額編解費銀內動給。○二十六年奏准。通濟庫所收輕齋銀兩。不敷支放。將蘇松每年解部輕齋銀內。撥銀四萬兩。以備支用。嗣後倉場奏銷。務遵定例。於每年歲底。覈明實用數目報銷。如有餘賸。按款解部。以清年款。○二十九年題准。浙江省輕齋銀兩。統限歲內全完。於次年起解輕齋時。悉行委員解送。如有未完。即行分別叅處。○嘉慶十七

年議准蘇松糧道所屬每年額解輕齋席木等銀一十四萬七千八百八十九兩零。除例解通濟庫六萬九百四十七兩零。餘贖銀八萬六千一百四十一兩零。在雍正年間起歸入漕項報撥。嗣後循照舊章。仍由糧道歸於奏銷報撥。免其起解報部。○同治四年覆准輕齋一款。向係隨漕徵解。上年奉

旨覈減浙江漕糧。漕項銀兩並未議減。所有減漕項下輕齋席木等三萬二千四百餘兩。另列專款。徵解部庫。至隨漕輕齋席木等銀。仍令按年徑解。

倉場以濟先漕要需。○五年奏准。浙江省減漕
項下輕齋席木等銀。另列專款。委員解部。所有
江蘇減漕輕齋。照浙江一律辦理。○十二年奏
准。江西兩湖三省。應解輕齋銀兩。務須恪遵定
例。越漕先解。總以通壩開運之先解到。儻藉口
動用。或遲延掣欠。即由倉場照例叅辦。

隨漕席木板竹。○每正兌改兌漕糧二石。山東
河南。徵長席一領。縱六尺四寸。廣三尺六寸。江
蘇安徽。江西。浙江。湖北。湖南。徵方席一領。縱廣
皆四尺八寸。其應改折色者。江蘇之鎮江。安徽

江西浙江湖北湖南。每領徵銀一分。蘇松常。三府。太倉一州。每領徵銀一分二釐。應解本色者。山東河南及江安糧道所屬。均徵本色席片。給運軍解交。蘇松糧道所屬。並江西浙江湖北湖南。均徵銀給運軍辦買。赴通交納。江安糧道所屬之寧甯池太各府。蘇松糧道所屬之蘇松常鎮太倉州。江西浙江湖北湖南。每正兌正米二千石。徵楞木一根。長一丈四尺九寸。圍圓二尺五分。松板九片。闊一尺三寸五分。厚五寸五分。其改徵折色者。每楞木一根。徵銀五錢至五錢。

五分。松板一片。徵銀四錢至四錢五分各不等。

江蘇安徽浙江江西湖北湖南正兌米俱有楞木松板。改兌米並無楞木松板。山東河南及江

安糧道所屬之廬鳳淮揚徐穎各府。均不徵楞木松板。江蘇安徽六安泗海通各州。均不徵楞木松板。

江西浙江湖北湖南糧艘到通。每船帶大竹一

根。中竹三根。蘇松糧道所屬各府州。大竹長二

丈一二尺。圍圓一尺一二寸。每根價銀二錢四

分。中竹長一丈一二尺。圍圓六七寸。每根價銀

一錢二分。江安糧道所屬安甯池太淮五府。廣

泗二州。大竹長三丈五尺。圍圓一尺八寸。至長

一丈二尺。圍圓八寸。每根價銀一錢五六分至

五六分不等。中竹長一丈六七尺。圍圓一尺二寸。至長一丈。圍圓四寸。每根價銀一錢二分。至八釐不等。江甯府及海通二州。毛竹向無定價。悉照時價造報。江西大竹長二丈。中徑五寸。每根價銀六分。中竹長一丈二尺。中徑二寸。每根價銀五分。湖北湖南大竹長二丈。中徑五寸。每根價銀湖北一錢。湖南九分。中竹長一丈二尺。中徑二寸。每根價銀湖北八分。湖南六分。○順治十三年題准。各省隨漕帶運本色席片板木。倉場侍郎覈明隨糧完欠。造冊按年奏銷。○又

題准。席片板木。各有長短闊狹尺寸。隨糧解交。務照定式。不許短少充數。亦不得濫收濫罰。致滋弊竇。○十五年題准。京糧廳裁缺。所有楞木松板。改歸大通橋監督交納。○又題准。正兌米例。進京倉。應解楞木松板。改撥通倉。即照改通米數扣留。以供鋪墊。或有河兌。其板木仍於大通橋交納。○十七年題准。席片板木。以供倉廩鋪墊。如運弁挂欠不完。總漕倉場侍郎限年追補。雖漕糧全完。不准議敘。○康熙八年定。應徵楞木。照江南折色定例。每根折銀五錢。松板。每

片折銀四錢五分。○九年定存。贖年久松板。每片變銀四錢二分。楞木每根變銀五錢三分。○二十五年題准。各省應徵隨糧席片。舊例係三分本色。七分析色。嗣後將三分本色內。再改折五釐。○雍正元年定。天津囤米。將席片交地方官。隨糧運通。其楞木松板。仍照舊由大通橋交收。○二年定。奉天採買米石。准照漕糧席片之例。於通濟庫內。動用輕齋銀兩。辦買鋪墊。仍將用過銀兩。造入奏銷冊內。具題查覈。○三年定。舊例鋪廠需用松板五十塊。楞木五根。今改為

滿鋪。應用松板一百一十塊。楞木十根。將松板以一鋸四。以代楞木。每板一塊。可抵楞木根半有餘。雍正四年為始。將十分松板。全徵本色。十分楞木。覈算價值。俱徵松板。○又奏准。各倉需用氣筒毛竹數目。令每船帶大毛竹二根。長二丈。中徑五寸。中毛竹十根。長一丈二尺。中徑二寸。除山東、河南二省外。其餘有漕各省。隨糧運交。○四年題准。各省應徵楞木、松板。舊例係三分本色。七折色。江、寧、甯、池、太。各府屬。將應徵本色。徵給運軍。蘇、松、常、鎮、四府。太倉一州。浙江

江西湖北湖南將應徵本色徵銀給運軍辦交。嗣後將松板全解本色。楞木改徵松板亦全解本色。○六年定裁大通橋額設板木書辦一名。板木車戶十三名。嗣後板木到橋令旗丁現雇車輓運送各倉。至板木長短寬窄向有部定尺寸。即由該監督照式查驗登記收受。○八年

諭。向因鋪墊倉廩需用松板。令各省糧船隨帶到倉交納。續經該部議定產木之省。如江西湖廣及江安糧道所屬地方。則全解十分本色。其不產木之浙江蘇松等屬。則解三分本色。七折色。此便民利用之意。

也。乃朕聞該地方所交三分本色。亦於抵通之時。始行採辦。以致通州木商。與胥役勾通包攬。每板一片。用銀至二兩餘。或一兩七八錢不等。較折色之數。多至四五倍。運軍不免苦累。今京通各倉。一年支放俸米。兵米。空出廠座。應鋪墊百五十餘座。其湖廣江西安徽三省所解松板。已足備用。即有應需採辦者。諒亦無多。所有不產木之浙江及蘇松等屬。應解三分本色松板二千五百四十片。著改徵折色。令各該糧道彙解通濟庫。以備採辦之用。其湖廣江西安徽等處全解十分本色者。著倉場侍郎嚴加稽查。不許收

板官吏勒索使費。俟各倉廩鋪墊完日。將應徵本色若干。具奏請旨。○又奏准。山東。河南二省。派徵長席。江南。江西。浙江。湖廣四省。派徵方席。每米二石。徵席一領。以二分五釐徵本色。付運軍交倉。以七分五釐徵折色起解。其應交本色席片。均以茶席二領。作為長席方席一領。惟各倉所用席片。每年多有餘賸。嗣後以一分七釐扣算。徵收本色起運。以八分三釐計算。徵收折色附解。○又奏准。蘇松等屬應解三分本色松板。改徵折色。所有原編三分楞木。改徵松板。自應一律折

徵。隨同輕齋銀兩。一併解部。○九年議准。湖北
省幫船漕糧。截留東省。應交席片木竹。難以運
通。令帶回水次。俟新運搭解。○十年議准。山東
省臨清德州二處。建造倉廩。截留漕米二十萬
石。所有隨漕席片。在東交納。以資鋪墊。○十二
年奏准。江南江西浙江湖廣各省糧船運通。舊
例。每船運軍自備大竹二根。中竹十根。解交各
倉。編造氣筒。嗣後每船大竹仍帶二根。中竹減
去四根。止帶六根。○又奏准。各省運丁所解席
片。定例將狹小茶席投交者。一概駁換。嗣後以

茶席二領。作原派方席斜席一領。查明收納。不得留難勒措。○乾隆二年奏准。每船再減中竹二根。止帶大竹二根。中竹四根。給以價值。於各道庫先期給發。以便採辦。○三年奏准。糧船隨帶席板毛竹。向例於抵通交米後。雇車運送到倉。經由大通橋查驗。各軍雇費艱難。嗣後各幫於起米之後。將板木席竹。在東嶽廟堆卸。由坐糧廳督令經紀雇車。改從陸路運送。由石道至朝陽門。不由大通橋經過。監督於朝陽門隨到隨驗進倉。中途遺失短少。責令經紀賠補。仍嚴

禁經紀不得藉端勒索。其應投橋倉文冊。各弁軍俟經紀知照起車之日。自赴投遞。掣獲倉收。○又覆准。江西省糧船帶解毛竹價銀。於裁兵米折項下動支。○五年奏准。江南江安各屬漕席片。例係州縣備辦本色交軍。因各州縣從前私自折交。以致運軍藉端勒索。嗣後辦交本色。毋許折銀。運軍毋得勒索。○六年奏准。現存木板。足敷四五年之用。所有江西湖廣產木之鄉。每年應徵之數。改徵折色一半。其江安所屬每年應解松板。全數改徵折色。彙解通濟庫。俟

將來別有需用。隨時酌辦。○又奏准。毛竹逐歲陳積。不無朽裂。應再減二根。每船各帶大竹一根。中竹三根。○又覆准。湖北省買辦毛竹。在於南糧抵兌。節省水腳銀內動支。○十一年覆准。各省幫船帶交毛竹。令糧道驗明是否合式。造冊咨送。令坐糧廳轉飭各幫。將現坐某倉船若干隻。應交大小毛竹若干。長徑丈尺若干。先期移倉查收。如有與冊開不符者。即令更換。其有冊開原屬與例不符者。亦准收用。不必駁回。統俟糧竣。彙冊咨送查覈。○十二年議准。河南省

隨漕應辦一分七釐本色席片。向無徵款。係運軍自辦交倉。今酌定席交本色。席銀於節省耗羨銀內動支。隨漕交軍。赴通交納。○十四年奏准。湖廣江西各省。應徵松板。一半解交本色。一半改折銀兩。今每年解收松板。已足敷用。所有應徵板竹。全交折色解通。俟將來徵解本色時。隨時計算。照舊辦運。○三十一年議准。嗣後席竹運交各倉。該倉於五日內查收。即移會坐糧廳。以便按期送驗。儻有勒索遲延。由倉場查明參究。○三十六年奏准。湖南江西等省。額徵松

板於三十七年為始。照數徵解。隨漕解通。以供鋪墊。○四十二年定。薊糧裁減之後。並無席折銀兩收存。即每年薊糧粟米所收席折。不過一兩有零。其奉天黑豆各倉。應用席片鋪墊。每年所領席折銀二十餘兩。不敷支放。統歸輕齋項下開除。嗣後所收薊糧席折。亦入輕齋項下造報。○五十五年奏准。湖廣江西等省。應徵本色松板。於乾隆五十六年為始。暫行停徵。俱令全交折色解通。俟將來應需本色時。奏請辦運。○嘉慶五年奏准。湖廣江西等省。額徵松板。照數

全徵本色。即於次歲隨漕解運。以供鋪墊。○六年覆准。湖北省正運松板。因商賈稀少。帶解雜木交納。與例不符。飭原船帶回。易換松板。於下運搭解。○七年定。湖南省漕糧內截撥陝西兵糧米八萬石。陝西省並無兌收本色蘆席。飭令湖南糧道。將截漕項下蘆席。搭運赴通交納。○九年定。各幫漕糧全單內應交席竹。令坐糧廳遵照定例。於交糧後。督令經紀。立即轉運到倉。並令各倉監督。照例於五日內收受明白。出具倉收。徑行移會坐糧廳查覈。○十三年議准。湖

南省辦解本色蘆席松板等項。向在漕項銀內
動支。巴陵等縣應徵漕項。因災緩徵。應辦本色
蘆席松板等項。無從扣價採辦。應令分年帶徵
辦運。○又定。湖北省止徵漕米。緩徵隨漕各屬。
應買本色蘆席松板價銀。為數無幾。飭令各屬
先行通融墊辦。給弁丁隨糧解通。俟各州縣帶
徵初限。隨漕銀兩。扣還歸款。○又定。湖北省通
山。當陽。二縣漕糧。向係徵收折色。另派江夏等
縣餘漕耗米代兌。江夏等縣漕糧耗米。隨正緩
徵。俟帶徵時。分年代兌。所有通山。當陽。二縣隨

漕錢糧內徵存應辦席板價銀亦俟代兌時分
年辦交。隨糧帶解。○又定。江西湖南二省。截卸
淮揚等處各幫應交席片。彙同毛竹松板。一併
緩俟下年搭運。○十四年定。江浙各幫搭解緩
交餘米項下。毋庸交納席片。有旗丁自行辦交
者。准於各該幫下年額漕項下應交席片內。照
數劃抵。○又定。截撥薊州兩年兵米。除支放外。
尚須囤儲一年。所有運丁應交席片。隨糧兌交
該處備用。○二十三年覆准。湖南省搭運米石。
照湖北搭運之例。一體免交席片。○又奏准。湖

廣江西等省。每年隨漕辦解十分本色松板。帶運到通。派儲京通各倉。以為鋪墊廠座之用。定為十六年抽換一次。自嘉慶六年辦解以來。除各倉鋪墊外。現存松板。數尚逾萬。樽節抽換。可敷十年鋪用。嗣後湖廣江西等省。應徵本色松板。於嘉慶二十五年為始。暫行停徵。全交折色解通。俟將來板片不敷應用。再行照舊辦運。○道光二年。奏准修整各倉廠座。需鋪板片甚多。所存之數。恐不敷用。飭令江廣二省。於道光三年為始。仍按年全徵本色。於次年隨船交納。○

三年奏准。嗣後糧船到壩。該旗丁應交方席。責成坐糧廳。每米一萬石。交席八百五十領。如係茶席。加倍交納。逐一驗明。令旗丁交與經紀等代為雇車。運至大通橋廠內堆儲。責令該橋監督點驗清楚。出給該經紀印票實收。再令大通橋車戶。就其運米車內。每米千石。分帶席片八十五領。同漕米一併運倉。交該倉監督點明收受。一體出給該車戶印票實收。所有兩處印票實收。每日彙繳坐糧廳。按十日一次。彙送倉場衙門查驗。如到橋席片短少。責令旗丁與經紀

賠補。如到倉短少。責令車戶賠補。儻該倉官役
有折收情弊。查出嚴叅究辦。其運米車戶搭運
席片。每方席一領。酌給腳費銀一釐。即於坐糧
廳庫存各役運腳項下。作正開銷。○六年覆准。
山東省任城徐河前後等幫。截撥大通橋黑豆。
應交斜席。每領折銀一分。交納通庫。與例不符。
飭令於辦理新漕時。將上年各該幫未交斜席。
按數購買齊全。搭解來通交納。至已交折席銀
兩。俟交席完竣。再行給發領回。○二十七年奏
准。江廣漕船重運。例帶免稅竹木。天蓬上准高

二尺。不計寬長。以天蓬為度。兩旁跨木各寬二尺。不計深長。以船身為度。令各該督撫及漕運總督。責成各該糧道督飭幫弁。於漕船未經開行之前。按照額定尺寸數目。實力查驗。如有違例多裝。勒令起卸入官。仍出具查驗無浮甘結。呈報總漕。如查驗不實。經各關監督查出多帶。除按則科算外。仍揭報總漕。將丁商從重治罪。員弁嚴加叅處。至押運員弁坐船。如違例私帶貨物。由該管督撫指名嚴叅懲辦。○同治九年覆准。江蘇省隨漕席竹二項。向按起運米數辦

解本色。所有減漕米石。既不起運。前二項銀兩。並非額編之款。嗣後免其起解。